

The logo consists of the words "NAŠA STRANKA" in white, uppercase letters on a red rectangular background.

Politička organizacija građana „Naša stranka“
Općinski odbor Velika Kladuša
Adresa: Huske Miljkovića 2, 77230 Velika Kladuša
Telefon: 061 483 217
E-mail: info@kladusajenasa.org

Bosna i Hercegovina
Federacija Bosne i Hercegovine
Unsko-sanski kanton
Općina Velika Kladuša
Općinsko vijeće Velika Kladuša

PREDMET: VIJEĆNIČKA INICIJATIVA

Poštovani,

Na osnovu člana 7. Poslovnika Općinskog vijeća Općine Velika Kladuša kojim se propisuje pravo vijećnika da podnosi inicijative, koje se odnose na rad Općinskog načelnika i službi za upravu u izvršavanju zakona, drugih propisa i općih akata Općinskog vijeća, kao i na rad institucija koje imaju javna ovlaštenja, Domu zdravlja Velika Kladuša i Općini Velika Kladuša upućujem **vijećničku inicijativu za otvaranje Centra za rani rast i razvoj u Velikoj Kladuši.**

O B R A Z L O Ž E N J E:

Bez obzira na sve veći broj djece sa poteškoćama u razvoju, neurorazvojnim poremećajima kao i poremećajima iz spektra autizma, Velika Kladuša je jedna od rijetkih općina koja nema nikakvu organizovanu vrstu pomoći takvoj djeci i njihovim roditeljima. Zbog toga, kao i zbog mnogih drugih benefita, potrebno je oživjeti Centar za rani rast i razvoj (CRR) koji je aktivno postojao u našoj općini u periodu 2013-2017. To je moguće ukoliko Dom zdravlja i Općina Velika Kladuša zajednički ulože napore i sredstva. Potrebno je da Dom zdravlja stavi na raspolaganje centru prostorije i stručna lica, a Općina pomogne u zatvaranju finansijske konstrukcije.

Pod pretpostavkom da nadležni Dom zdravlja ustupi prostor, što ovom inicijativom tražimo od njih, neophodno bi bilo izdvojiti godišnji budžet od okvirno 200.000 KM za finansiranje centra, što je iznos koji je moguće izdvojiti iz budžeta Općine. U taj iznos ulaze: plate, edukacije uposlenika, potrošni materijal, namještaj, neurofeedback sa popratnom opremom, te ostala oprema i pomagala za rad sa djecom.

U početnom periodu u centru bi bila zaposlena jedna osoba koja bi koordinirala rad centra, a kako DZ ima stručnjake koji su predviđeni za oblasti koje centar nudi, po potrebi bi i oni bili uključeni u rad centra.

Misija CRR-a jeste širenje i implementacija spoznaja o krucijalnom značaju prvih godina života djeteta za cjelokupni razvoj buduće osobe, te stalna podrška roditeljima u razumijevanju djece i njihovih potreba. Postojanje centra bi itekako olakšalo djeci i roditeljima put od uspostavljanja dijagnoze do tretmana pojedinih poremećaja i eventualnog nastavka tretmana na nekim drugim lokacijama po potrebi. Takođe, jedan od značajnih rezultata centra jeste i edukacija budućih roditelja o smjernicama pravilnog razvoja djeteta u svih 5 razvojnih oblasti, te pravilnog izbora odgojnog modela roditeljstva.

Stoga, ovom inicijativom tražimo od rukovodstva Doma zdravlja da se u narednih 30 dana očituju o spremnosti da učestvuju u ovom projektu, a od rukovodstva Općine (Općinski načelnik i Općinsko vijeće) da osiguraju potrebna sredstva u budžetu za 2024. godinu ukoliko odgovor iz Doma zdravlja bude pozitivan.

Ime i prezime: Selma Kendić
Klub vijećnika Naše stranke

Velika Kladuša, 26.09.2023.